

大佛頂如來密因修證了義諸菩薩萬行首楞嚴經卷第六

四種清淨明誨

第一清淨明誨

佛告阿難。汝常聞我毘奈耶中。宣說修行三決定義。所謂攝心為戒。因戒生定。因定發慧。是則名為三無漏學。

阿難。云何攝心我名為戒。若諸世界六道眾生。其心不婬。則不隨其生死相續。

汝修三昧本出塵勞。婬心不除塵不可出。縱有多智禪定現前。如不斷婬。必落魔道。上品魔王。中品魔民。下品魔女。彼等諸魔亦有徒眾。各各自謂成無上道。

我滅度後末法之中。多此魔民熾盛世間。廣行貪婬為善知識。令諸眾生。落愛見坑。失菩提路。

汝教世人修三摩地。先斷心婬。是名如來先佛世尊第一決定清淨明誨。

是故。阿難。若不斷婬。修禪定者。如蒸沙石。欲其成飯。經百千劫。祇名熱沙。何以故。此非飯本。石沙成故。

汝以婬身求佛妙果。縱得妙悟皆是婬根。根本成婬。輪轉三途。必不能出。如來涅槃何路修證。

必使婬機身心俱斷。斷性亦無。於佛菩提斯可希冀。

如我此說名為佛說。不如此說即波旬說。